

DOMENIE XXI «VIE PAL AN»

Antifone di jentrade cf. Sal 85,1-3

Slungje la tô orele, Signôr, e rispuindimi:
gno Diu, salve il to famei che in te al spere;
ve dûl di me, Signôr,
che o ài berlât viers di te dute la zornade.

Colete

Diu, che tu unissis tun sôl volê i cûrs dai tiei fedêi,
dâur ai tiei popui di volê ben a ce che tu comandis
e di bramâ ce che tu desideris
par che, framieç dai savoltaments di chest mont,
i nestrîs cûrs a sedin pontâts là che e je la vere gjonde.
Pal nestri Signôr Jesù Crist to Fi, che al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE Js 24,1-2a.15-17.18b

O starin cul Signôr, parcè che al è lui il nestri Diu.

Dal libri di Josuè

In chei dîs, Josuè al clamà a Sicheim dutis lis tribûs di Israel; po al clamà dongje ducj i anzians di Israel, i siei socestants, i siei judiçs e i siei scrituriscj, che si meterin presince di Diu. Alore Josuè i disè a dut il popul: «Se no us va di stâ sot dal Signôr, sielzêt daurman cui che o volês servî: se i dius che a levî daûr i vuestris vons di là dal flum o ben i dius dai Amoreus che o sês a stâ cumò te lôr tiere. Par chel che mi rivuarde me e la mê int, nô o starin cul Signôr!».

Il popul al rispuindè: «Nancje insumiâsi di butâ di bande il Signôr par stâ sot di altris dius! Il Signôr nestri Diu al è chel che nus à fats vignî sù, nô e i nestrîs vons, de tiere dal Egjit, de cjase che o jerin sotans, che al à fat robonis sot dai nestrîs vôi e nus à parâts dilunc fûr te strade che o vin fate e framieç di dutis lis tribûs che o vin passât jenfri. Ancje nô o starin cul Signôr, parcè che al è lui il nestri Diu!».

Peraule di Diu.

SALM RESPONSORIÂL dal Salm 33

R. Il Signôr al è dongje di chei che lu servissin.

O vœi benedî il Signôr cence polse,
la sô laut simpri su la mê bocje.
La mê vite tal Signôr si glorie,
che lu sepin i puars e si indalegrin. **R.**

I vôi dal Signôr a son dome pe int juste
e lis sôs orele pai lôr berlis cuant che lu clamin.
Il Signôr al ten di voli chei che a fasin robatis,
par scancelâ ancje il lôr ricuart di cheste tiere. **R.**

I juscj a àn berlât e il Signôr ju à sintûts
e ju à deliberâts di ogni berdei.
Se un al à il cûr displasint il Signôr i sta dongje,
se al à il cûr pintût lu salve. **R.**

Lis disgraciis dal just a son tantis,
ma il Signôr lu delibere di dutis.
Ducj i siei vœs lui ju vuarde,

in mût che nancje un no si crevi. **R.**

Il trist al è fat fûr de sô tristerie;
chei che a odein il just a àn di purgâlis.
Il Signôr al salve la vite dai siei fameis;
chei che si parin li di lui no varan cjastic di sorte. **R.**

SECONDE LETURE Ef 5,21-32

Chest misteri al è grant: lu dîs sul cont di Crist e de glesie.

De letare di san Pauli apuestul ai Efesins

Fradis, stait sometûts un a chel altri tal timôr di Crist.

Lis feminis che a sedin sometudis ai lôr oms come al Signôr, parcè che l'om al è cjâf de femine, come che ancje il Crist al è cjâf de glesie, lui che al è il salvadôr dal so cuarp. E come che la Glesie e je sometude a Crist, cussì ancje lis feminis a àn di jessi sometudis ai lôr oms in dut.

Oms, volêt ben a lis vustris feminis come che Crist i à volût ben a la Glesie e si è ufiert par jê par fâle sante, smondeantle cu la purificazion da l'aghe compagnade de peraule, e par vê dongje di sè cheste Glesie, sflandorose, cence magle o grispe o alc altri dal gjenar, ma sante e imacolade. Cussì ancje i oms a àn di volêur ben a lis lôr feminis, come ai lôr cuarps. Chel che i vûl ben a la sô femine si vûl ben a sè: di fat nissun nol à mai odeade la sô stesse cjar; che anzit le nudrîs e le trate cun cure, come che al fâs ancje Crist cu la sô Glesie, parcè che o sin parts dal so cuarp. Par chel l'om al bandonarà so pari e sô mari e si tirarà dongje de sô femine e i doi a diventaran une cjar sole. Chest misteri al è grant: lu dîs sul cont di Crist e de glesie.

Peraule di Diu.

CJANT AL VANZELI Zn 6,63.68

R. Aleluia, aleluia.

Lis tôs peraulis, Signôr, a son spirt e vite.

Dome tu tu âs peraulis di vite eterne.

R. Aleluia.

VANZELI Zn 6,60-69

Di cui varessino di lâ? Dome tu tu âs peraulis di vite eterne.

Dal vanzeli seont Zuan

In chê volte, dopo di vê sintût cussì, une vore dai siei dissepui i diserin: «Chest discors al è dûr. Cui rivial a parâlu jù?». Jesù, savint dentri di sè che i siei dissepui a bruntulavin a rivuart di chest discors, ur disè: «Chest us scandalizial? E cuant che o viodarês il Fi dal om a lâ sù là che al jere prime? Al è il Spirt chel che al fâs vivi, la cjar no zove a nuie. Lis peraulis che us ài ditis a son spirt e a son vite. Ma ind è cualchidun fra di vualtris che nol crôt». Di fat Jesù al saveve ancjemò di biel principi cui che a jerin chei che no crodevin e chel che lu varès tradît. E al diseve: «Par chest us ài dît: Nissun nol pò vignî di me se no i è dât dal Pari».

D'in chel moment une vore dai siei dissepui si tirarin indaûr e no levin plui cun lui. Alore Jesù ur disè ai Dodis: «Volêso lâsint ancje vualtris?». I rispuindè Simon Pieri: «Signôr, di cui varessino di lâ? Dome tu tu âs peraulis di vite eterne, e nô o vin crodût e o vin ricognossût che tu tu sês il Sant di Diu».

Peraule dal Signôr.

Su lis ufiertis

Signôr, che cuntune sole vitime,
ufierte une volte sole,
tu ti sês cuistât un popul di fîs,
danus, inte tô Glesie, la gracie de unitât e de pâs.
Par Crist nestri Signôr.

Antifone a la comunion cf. Sal 103,13-15

Cul prodot des tôs voris tu passis la tiere, Signôr,
par tirâ fûr il pan de tiere e il vin che al indalegri il cûr dal om.

O ben: Zn 6,54

Chel che al mangje la mê cjar e al bêf il gno sanc
al à la vite eterne, al dîs il Signôr,
e jo lu risussitarai te ultime dì.

Daspò de comunion

La midisine dal to boncûr, Signôr,
che e operi ad implen dentri di nô
e judinus e refinissinus
in mût di fâti content in ogni nestre vore.
Par Crist nestri Signôr.